

Inatsisartut aalajangiiffigisassaattut siunnersuut Naalakkersuisut peqquneqassasut, Kalaallit Nunaannut aqqusinikkut angallannermut inatsi allanngortinnissaa pillugu Rigsmyndighed-mut saaffiginnissasut, qamuterallannut ingerlatsisinnanannermut 16-nik ukioqarsimanissamut inissinneqarnissaanik.

(Inatsisartunut ilaasortaq Jens-Frederik Nielsen, Demokraatit)

Akissuteqaat

(Ineqarnermut Attaveqaasersuutinullu Naalakkersuisoq)

Siullermeerneqarnera

Aallarniutigalugu Naalakkersuisut sinnerlugit Inatsisartunut ilaasortaq Jens-Frederik Nielsen, Demokraatit, aalajangiiffigisassatut siunnersuuteqarneranut qutsavigaara.

Qamuterallannik ingerlatsisinnanannissamut ukiunut piimasaqaat 16-inik ukioqarsimanissamut appartinneqassasoq, siunnersuuteqartup kissaatigaa. Taakkua Danmarkimi najugaqartuuppata, 16-inik ukiullit knallertinik ingerlatsisinnaatitaassagaluartut, innersuussutigineqarpoq.

Danmarkimi 16-inik ukiullit knallertsinik ingerlatsisinnanannissamut allagartaqarunik knallertsinik, nalunaaquttap akunneranut 30 kilometerorsolutik ingerlasinnaasunik, ingerlatseqqusaapput. Tamatumani piimasaqaataapput ikiueqqaarnissamut pikkorisarsimanissaq, nalunaaquttap akunnerini 30-ni atuartinneqarsimanissaq kiisalu ingerlatsinissamut atuagarsorluni ingerlatsillunilu misilitsinnermi angusisimanissaq. Sanilliukkaanni Kalaallit Nunaanni qamuterallannik, nalunaaquttap akunneranut 100 kilometerit sinnerlugit ingerlasinnaasunik, ingerlatsinannissamut allagartaqarnissaq piimasaqaataannilaq.

Kalaallit Nunaanni qamuterallaat amerliartupiloorput. Qamuterallaat amerlasuut illoqarfinni annerusuni atornerqarput. Qamuterallaat illoqarfinnukarneranni aammalu illoqarfimmiit aallarneranni angallattunut allanut tunngatillugu tamanna navianartunik pisoqarfiusinnaavoq. Aamma nunakkoornermi navianartoqarpoq. Ajorluartumik paasivarput qaammatit arlaqanngitsut iluanni qamuterallannik ajutoornerni inuit marluk ajunaarsimasut, tamarnik misilittagaqarluartuullutik. Eqqaaneqarnerat ataqqinartuuli. Iisimasat tunngavigalugit assartuussinissamut pisariaqartitsinerup aammalu aqqusinertigut angallannermi isumannaallisaanerup oqimaaqatigiissaarnerisigut maleruagassanik allanngortitsineq pisariaqaralarpoq. Tassunga ilanngullugu aamma nunakkoorluni aammalu sumiiffinni ineqarfiusuni ingerlaarneq assigiinngissuteqarput. Piimasaqaatit assigiinngitsuunissaat takorloorneqarsinnaavoq.

Atorfilitani suleqatigiissitaliamik, Ineqarnermut Attaveqaasersuutinullu Naalakkersuisoqarfimmiit, Assartuussinermut ministereqarfimmiit, Færdselestyrelsimiit,

Naalagaaffimmi politiiniit aamma Kalaallit Nunaanni Politiinit peqataaffigineqartumik, pilersitsisoqareerpoq, qamuterallannut aamma ATV-inut ingerlatsisinnaanissamut allagartaqartarnermut maleruagassanik misissuilluni aallartereersumik. Qamuterallannik ingerlaarnissamut ukiunut killissat pillugit apeqqut suleqatigiissitaliap isumaliutersuutaanni ilaatinneqarpoq. Suleqatigiissitaliami suliaassat ilagaat susassaartut qanimut suleqatiginerisigut qulaajaalluarsimanissaq, taamaasilluni, taakkua ilisimasaat siunnersuutissaallu pissarsiariniarlugit Naalakkersuisut qallunaat nunaanni akisussaasut ataatsimeeqatiginnittussaallutik.

Qamuterallannut aamma ATV-inut maleruagassat qimerloornissaannik suliaasaq annertuumik pingaartinneqarpoq.

Taamatut oqaaseqarlutik Naalakkersuisut allannguutissatut siunnersuut manna saqqummiuppaat:

”Qamuterallannik ingerlatsisinnaanissamut ukiunut piunasaqaatip allanngortinnissaa pillugu apeqqutip, aqqusinertigut angallannermut suliaasaqarfimmi ajornartorsiutit pillugit suleqatigiissitaliap suliaqarnerani ilannguteqqullugu, Naalakkersuisut peqquneqarnissaat pillugu Inatsisartut aalajangiiffigisassaattut siunnersuut”